

Na osnovu odredaba člana 8. Zakona o računovodstvu i reviziji Bosne i Hercegovine („Službeni glasnik BiH“, broj 42/04), člana 10. Zakona o računovodstvu i reviziji u Federaciji Bosne i Hercegovine („Službene novine Federacije BiH“, broj 32/05), Odluke o nostrifikaciji certifikata i Odluke o prenosu ovlaštenja („Službeni glasnik BiH“, broj 81/04), te čl. 6. i 27. Statuta Saveza računovođa, revizora i finansijskih radnika Federacije Bosne i Hercegovine, Upravni odbor Saveza na sjednici održanoj dana 09. 11. 2006. godine u Sarajevu donio je

P R A V I L N I K **o nostrifikaciji certifikata**

Član 1.

Ovaj Pravilnik uređuje uslove i način nostrifikacije certifikata, izdatih izvan BiH, koju vrši Savez računovođa, revizora i finansijskih radnika Federacije BiH (u daljem tekstu: Savez).

Član 2.

Pod nostrifikacijom se podrazumijeva prihvatanje ili priznavanje certifikata izdatih od neke druge asocijacije ili drugog ovlaštenog tijela izvan BiH, kao da su izdati od strane ovog Saveza, te izdavanje certifikata Saveza za odgovarajuće zvanje u računovodstvenoj profesiji u skladu sa propisima BiH i Federacije BiH.

Član 3.

Savez će vršiti nostrifikaciju certifikata izdatih izvan BiH na principima uzajamnosti, o čemu će ostvarivati kontakte i sklapati sporazume sa profesionalnim asocijacijama, odnosno drugim nadležnim organima i tijelima izvan BiH.

Član 4.

Kandidati za nostrifikaciju trebaju podnijeti Savezu prijavu za nostrifikaciju, ovjerenu kopiju certifikata izdatog izvan BiH, kao i dokaze o ispunjavanju ostalih uslova za certifikaciju koji su utvrđeni ovim Pravilnikom.

Prilikom nostrifikacije certifikata nužno je imati u vidu i Pravilnik o kontinuiranoj profesionalnoj edukaciji lica iz računovodstvene profesije.

Član 5.

Certifikat izdat od asocijacije ili drugog ovlaštenog tijela izvan BiH, nostrificira se i zamjenjuje certifikatom Saveza za odgovarajuće zvanje u računovodstvenoj profesiji, pod slijedećim uslovima:

- a) **Certificirani računovodstveni tehničar:** Kandidat treba da ima najmanje četvorogodišnju srednju školsku spremu i da ispunjava ostale uslove shodno Odluci o uslovima za sticanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.
- b) **Certificirani računovođa:** Kandidat treba da ima univerzitetsko obrazovanje ili višu školsku spremu i da ispunjava ostale uslove shodno Odluci o uslovima za sticanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.

- c) **Ovlašteni revizor:** Kandidat treba da ima univerzitetsko obrazovanje i da ispunjava ostale uslove shodno Odluci o uslovima za sticanje zvanja u računovodstvenoj profesiji, te da posjeduje certifikat za odgovarajuće zvanje koji je izdat izvan BiH.
- d) Kandidat treba da je član Saveza i da je platio članarinu za tekuću godinu.
- e) Kandidat treba da podnese dokaz o plaćenim troškovima nostrifikacije, koje određuje Upravni odbor Saveza posebnom odlukom, a koji obuhvataju troškove polaganje testa i troškove izdavanja novog certifikata.
- f) Kandidat treba da je prethodno položio test iz člana 6. ovog Pravilnika.

Član 6.

Test za nostrifikaciju certifikata organizira Savez, prema potrebi i u zavisnosti od broja prijavljenih kandidata, a test obuhvata slijedeće teme:

- a) Legislativa
 - 1) Zakon o privrednim društvima
 - 2) zakoni o računovodstvu i reviziji BiH / Federacije BiH
 - 3) Zakon o bankama i drugim finansijskim institucijama
 - 4) zakoni o direktnim i indirektnim porezima
- b) Profesionalna regulativa
 - 1) Kodeks profesionalne etike računovođa i revizora
 - 2) Računovodstvena zvanja i način sticanja
 - 3) Okvir za sastavljenje i prezentaciju finansijskih izvještaja
 - 4) Položaj, uloga, prava i obaveze Saveza
- c) Međunarodni standardi finansijskog izvještavanja (MSFI/MRS)
- d) Međunarodni standardi revizije (MSR)

Kandidati koji su stekli certifikat prema pravilima IFAC-a, odnosno koji su prethodno polagali MSFI/MRS i MSR, o čemu trebaju podnijeti i odgovarajući dokaz, nisu obavezni da polažu test iz oblasti pod c) i d), nego samo test iz oblasti pod a) i b) stava 1. ovog člana.

Član 7.

Uz prijavu za nostrifikaciju kandidat dostavlja:

- 1. Ovjerenu kopiju diplome o završenoj školskoj spremi;
- 2. Ovjerenu kopiju certifikata sa programom polaganja za njegovo sticanje;
- 3. Uvjerenje poslodavaca o iskustvu na računovodstvenim i finansijskim poslovima, odnosno konkretnim radnim mjestima prema zahtjevima Odluke o uslovima za sticanje zvanja u računovodstvenoj profesiji, s tim da uvjerenje sadrži i rečenicu: "Pod moralnom, materijalnom i krivičnom odgovornošću tvrdim da su podaci u ovom uvjerenju tačni". Kada je riječ o radnoj karakteristici, istu treba da potpiše i Certificirani računovođa, odnosno Ovlašteni revizor;
- 4. Dokaz o članstvu u Savezu i plaćenju članarini za tekuću godinu;
- 5. Dokaz o plaćenim troškovima nostrifikacije iz člana 4. stav 1.e) ovog pravilnika.

Ako je to potrebno, kandidat je uz dokaze iz tač. 1. do 3. dužan dostaviti i prevod tih dokumenata na jedan od službenih jezika u BiH, od registriranog sudskog tumača.

Član 8.

Kandidatima koji ispune sve prethodne uslove i koji polože test iz člana 6. ovog Pravilnika, Savez vrši nostrifikaciju certifikata i izdaje certifikat Saveza za odgovarajuće zvanje u računovodstvenoj profesiji u skladu sa propisima BiH i Federacije BiH i Odlukom o vrstama profesionalnih zvanja u računovodstvenoj profesiji.

Član 9.

Nakon izdavanja novog certifikata kandidatu se, na njegov zahtjev i po za to predviđenom postupku, izdaje i licenca za odgovarajuće zvanje, s tim da je za izdavanje licence za Ovlaštenog revizora nadležno Federalno ministarstvo finansija/financija.

Član 10.

Ovaj Pravilnik stupaju na snagu i primjenjuje se od dana donošenja.

Član 11.

Ovaj Pravilnik će biti objavljen na web stranici Saveza i u stručnim časopisima članica Saveza.

Tumačenje odredaba ovog Pravilnika daje Upravni odbor Saveza, a njegove izmjene i dopune vrše se na način na kako je i donesen.

Broj:PR-1/11-06

Sarajevo, 09. 11. 2006. godine

Predsjednik UO Saveza

Milan Dmitrović